



INTERVENCIÓN XERAL E XESTIÓN ECONÓMICO-FINANCEIRA

EXPEDIENTE SUBTEL: 2022000029116

**ASUNTO: INFORME DEFINITIVO DE AUDITORÍA FINANCEIRA SOBRE AS  
CONTAS ANUAIS DO 2021 DO CONSORCIO PROVINCIAL CONTRA  
INCENDIOS E SALVAMENTO.**

**DESTINATARIOS:**

**PRESIDENCIA E PLENO DO CONSORCIO.**

**PLENO DA DEPUTACIÓN PROVINCIAL.**

**CONSELLO DE CONTAS DE GALICIA.**

**TRIBUNAL DE CUENTAS.**

## **I. INTRODUCCIÓN.<sup>1</sup>**

O órgano interventor da Deputación Provincial, no exercicio das competencias que lle confiren os artigos 213 e seguintes do Texto refundido da Lei reguladora das Facendas locais e dándolle cumprimento ao disposto no artigo 29.3. A), apartado d), do Regulamento de réxime xurídico do control interno das entidades que conforman o sector público local (RD 424/2017, do 28 de abril), na execución do Plan de control interno 2020-2021, levou a cabo a auditoría das Contas anuais do **CONSORCIO PROVINCIAL CONTRA INCENDIOS E SALVAMENTO DA CORUÑA (V15859481) correspondentes ao exercicio 2021**, que comprenden o Balance de Situación a 31 de decembro de 2021, a Conta do resultado económico-patrimonial, o Estado de cambios do patrimonio neto, o Estado de fluxos de efectivo, a Memoria e, asemade, a Liquidación do Orzamento do Exercicio 2021.

<sup>1</sup> Na presentación e orde de contidos deste informe tomamos en consideración a totalidade das NIA-ES SP aprobadas pola Resolución da Intervención xeral do Estado de 25 de outubro de 2019, seguindo a estrutura fixada pola Nota técnica 1/2020 da Oficina Nacional de Auditoría da IGAE. Asemade, no tocante á redacción, procurouse realizar en cada apartado unha exposición clara, obxectiva, ponderada e sistemática, tendo en conta a importancia cuantitativa e cualitativa da mesma, de conformidade coa Resolución da IGAE de 30 de xullo de 2015 de recomendacións para o exercicio da auditoría pública.



## INTERVENCIÓN XERAL E XESTIÓN ECONÓMICO-FINANCEIRA

### II. OPINIÓN MODIFICADA.<sup>2</sup>

Na nosa opinión, **excepto polos efectos das cuestións descritas na sección de Fundamento de opinión con deficiencias do noso informe**, as contas anuais achegadas expresan, en todos os aspectos significativos, a imaxe fiel do patrimonio e da situación financeira da entidade a 31 de decembro de 2021, así coma os seus resultados e fluxos de efectivo correspondentes ao exercicio rematado en dita data, de conformidade co marco normativo de información financeira que resulta de aplicación (que se recolle na Nota 2 da Memoria) e, en particular, cos principios e criterios contábeis e orzamentarios contidos no mesmo.

### III. FUNDAMENTO DA OPINIÓN.

Tal como se adiantou no epígrafe anterior, emítase unha opinión modificada polas seguintes deficiencias que se teñen atopado e que se van numerando en sub-epígrafes separados, tendo todas elas o carácter de incorrección material non xeralizada.

#### 1. **A omisión da contabilización de recoñecemento de dereitos da taxa pola prestación de servizos de extinción de incendios por importe de 45.875,31 euros.**

No proceso analítico seguido para a comprobación dos saldos de dereitos pendentes de cobro, detectouse a omisión de contabilización do Decreto da Presidencia número 277/2021, de 11 de novembro de 2021, polo que se aprobaban liquidacións da taxa polo prestación do servizo de extinción de incendios por un importe total de 45.875,31 euros. Esta falla de contabilización produce unha incorrección material nas seguintes contas e estados:

---

<sup>2</sup> Na emisión da opinión e no seu fundamento seguimos a NIA-ES-SP 1705 R.



## INTERVENCIÓN XERAL E XESTIÓN ECONÓMICO-FINANXEIRA

- As columnas de dereitos recoñecidos totais, dereitos recoñecidos netos e pendentes de cobro da aplicación orzamentaria 31900, na Liquidación do Orzamento de Ingresos.
- O importe que figura na Conta 740, dentro do epígrafe de ingresos tributarios, da Conta do resultado económico-patrimonial. O resultado da xestión ordinaria que ofrece este estado tería que incrementarse polo importe omitido, sendo entón de 1.523.153,55 euros, no canto de 1.477.278,24 euros. En similar importe tería que corrixirse á alza o resultado do exercicio, pasando a ser este de 1.490.342,21 euros.
- De igual xeito, a omisión afecta ao Resultado orzamentario total e ao Resultado orzamentario axustado, cifras que deberían incrementarse no importe omitido, acadando os importes de 1.768.491,95 e 1.289.543,46, respectivamente.
- Os dereitos pendentes de cobro ao final do exercicio tamén deben incrementarse no importe omitido na contabilización do recoñecemento deste dereito, afectando á información que figura no Balance de situación, saldo da conta 430 (Activo circulante), aumento que correlativamente repercutiría no importe do Patrimonio neto, ao aumentar en igual magnitude o Resultado do exercicio que figura na Conta 129 (Resultado do exercicio).
- Asemade, a omisión afecta ao Estado do remanente de tesourería, no que se toman en consideración os dereitos pendentes de cobro ao final do exercicio.

### **2. As diferenzas entre os dereitos pendentes de cobro rexistrados na Conta xeral e os valores xestionados polo Servizo de Recadación da Deputación.**



### INTERVENCIÓN XERAL E XESTIÓN ECONÓMICO-FINANXEIRA

Logo da comprobación analítica realizada sobre os dereitos pendentes de cobro do exercicio corrente 2021 e dos exercicios pechados, comparouse a información obtida coa solicitada ao Xefe do Servizo de Recadación da Deputación, obténdose as seguintes diferenzas:

EXERCICIO	CONTABILIDADE	RECADACIÓN	DIFERENZA
2016	6.773,00	11.017,24	+ 4.244,24
2017	42.883,40	30.124,00	- 12.759,40
2018	64.568,46	25.087,87	- 39.480,59
2019	9.262,72	6.036,16	- 3.226,56
2020	2.499,50	1.604,50	- 895,00
2021	237.398,60	156.516,78	- 80.881,82
<b>TOTAL</b>	<b>363.385,68 €</b>	<b>230.386,55 €</b>	<b>- 132.999,13 €</b>

Remitida esta información á Secretaría-Intervención do Consorcio, no informe emitido con data de 14 de xullo de 2022, a funcionaria titular expón:

- Que o ingreso efectivo das liquidacións cobradas no 4º trimestre de 2021 correspondentes a ese mesmo exercicio, por importe de 128.815,31 euros, non se recibiu ata o 8 de abril de 2022, polo que non puido producir efectos contábeis no exercicio 2021. Este importe salda parcialmente a diferenza contabilidade/recadación, sendo agora que resultaría un exceso de 2.158,18 euros de dereitos cobrados con respecto aos pendentes de cobro.
- A diferenza de 39.480,59 euros correspondente aos dereitos pendentes de cobro do exercicio 2018, quedan reducidos a 8.093,16 euros, segundo a aclaración realizada no referido informe da Secretaria-interventora.

Esta segunda incorrección material, illadamente considerada, resulta inferior no seu importe á cifra de materialidade global corrixida, polo pola aplicación do principio de importancia relativa non afecta significativamente a imaxe fiel do



## INTERVENCIÓN XERAL E XESTIÓN ECONÓMICO-FINANCEIRA

patrimonio e da situación económico-financeira que resulta da Conta xeral auditada.

### **3. O importe dos dereitos recoñecidos no concepto 31900 do Estado de ingresos (taxa pola prestación de servizos) non reflicte adecuadamente as devindicacións producidas segundo a Ordenanza fiscal nº 1.**

Segundo consta na Memoria xustificativa do custe e rendementos do servizos que se achega coas Contas anuais que se están a auditar, ao longo do ano 2021 os efectivos dos dez parques de bombeiros realizaron un total de 2.637 intervencións, actuacións materiais que, logo de seren cualificadas xurídicamente, deberían ter dado lugar, na meirande parte dos casos, a práctica dunha liquidación tributaria pola taxa de prestación de servizos que está regulada na Ordenanza fiscal nº 1. Ditas liquidacións, logo de seren aprobadas por Resolución da Presidencia, deberían reflectirse contablemente mediante o correspondente recoñecemento de dereito sobre o concepto 319.00 do Estado de ingresos, xerándose á par un cargo na conta 430.0 da contabilidade financeira da entidade.

Mais o retraso acumulado na actividade de xestión tributaria da entidade, tal como xa se indicou nos informes de auditoría emitidos con respecto ás contas anuais dos exercicios 2019 e 2020, evidencia que non se realizaron polo de agora as liquidacións correspondentes a estas posibles devindicacións do tributo.

Ben é certo que dende a data de devindicación, a administración dispón do prazo de catro anos para a práctica das liquidacións e, no momento que se produza estas, contabilizárase o recoñecemento de dereito no orzamento do correspondente exercicio; con todo, cómpre advertir de novo deste retraso temporal, de xeito que nun prazo razoable de tempo se poida lograr a plena



## INTERVENCIÓN XERAL E XESTIÓN ECONÓMICO-FINANCEIRA

sincronización entre a realización do feito impositivo e a xeración da correspondente liquidación, evitando o risco dunha posible prescrición e mesmo acadar deste xeito unha maior eficacia recadatoria.

Para dar esta opinión modificada con deficiencias, temos executado a auditoría de conformidade coa normativa reguladora da actividade de auditoría de contas vixente no Sector Público en España (NIA-ES-SP, aprobadas por Resolución da Intervención xeral do Estado de 25 de outubro de 2019). As nosas responsabilidades de acordo con ditas normas descríbense máis adiante na sección *“Responsabilidades do auditor en relación coa auditoría das contas anuais”* do noso informe.

Somos independentes da entidade, de conformidade cos requirimentos de ética e de protección da independencia que son aplicables a nosa auditoría das contas anuais para o Sector público en España<sup>3</sup>, segundo o esixido pola normativa reguladora da actividade de auditoría de contas de dito Sector público.

Consideramos que a evidencia de auditoría que obtivemos proporciona unha base suficiente e adecuada para a nosa opinión modificada con deficiencias ou incorreccións materiais indicadas.

## IV. CUESTIÓNS CLAVE DE AUDITORÍA.

As cuestións clave de auditoría son aquelas que, segundo o noso xuízo profesional, teñen sido de maior importancia ou alcance na nosa auditoría de contas anuais do período actual. Estas cuestións teñen sido tratadas no contexto da nosa auditoría das contas anuais no seu conxunto, e na formación

---

<sup>3</sup> A estes efectos, seguimos a Nota técnica 1/2018, da Oficina Nacional de Auditoría, tendo incorporado ao expediente un cuestionario debidamente cuberto polas dúas persoas que temos participado nos traballos.



## INTERVENCIÓN XERAL E XESTIÓN ECONÓMICO-FINANCEIRA

da nosa opinión sobre as mesmas, polo que non expresamos unha opinión por separado das mesmas.

Ademais das cuestións descritas na sección “3. *Fundamento de opinión con deficiencias*” temos resolto que a cuestión que se describe deseguido é unha cuestión clave de auditoría que se debe comunicar no noso informe.

Advertimos de que o cambio de modelo de xestión do servizo de extinción de incendios e salvamento e a conseguinte subrogación do persoal contratado polas empresas concesionarias afecto a estas prestacións (punto 2º da sesión plenaria que tivo lugar o día 13 de setembro de 2019) pode derivar en que a entidade teña que facer fronte ás indemnizacións que se determinen nas sentenzas xudiciais firmes que decidan os preitos pendentes a data actual, así coma outros que se poideran presentar no momento en que se rematen os procedementos que han de instruírse para a selección definitiva de persoal.

Existindo o risco exposto, non consta que a entidade teña dotado provisión ningunha para as posibles responsabilidades, de conformidade co previsto na Norma de Valoración 17ª da Terceira parte do Plan xeral de contabilidade pública adaptado á Administración local, ao existir unha obriga legal, que poidera ter como probable unha aplicación ou desprendemento de recursos, sobre os que aínda non podendo facerse unha estimación precisa, sí que podería facerse unha primeira estimación fiable, tomando en consideracións as pretensións presentadas nas demandas recibidas ata esta data.

### V. PÁRRAFO DE ÉNFASE.<sup>4</sup>

Temos que chamar a atención sobre a escasa capacidade da entidade para xerar os seus propios recursos e a súa excesiva dependencia do financiamento ordinario que recibe das dúas administracións que a integran (os cobros por

---

<sup>4</sup> Nesta sección tomamos en consideración a NIA-ES-SP 1706.



## INTERVENCIÓN XERAL E XESTIÓN ECONÓMICO-FINANXEIRA

transferencias supuxeron o 73,67 por cento dos dereitos recoñecidos netos no exercicio). Isto indica que as persoas e entidades beneficiarias do servizo son gravadas cunha taxa que acada só o 26,33 por cento do custo do servizo, recaendo o importe restante no conxunto das persoas contribuíntes. Lémbrese a este respecto que, na meirande parte dos casos, a débeda tributaria é asumida polas compañías aseguradoras dos bens sinistrados, integrándose o gasto dentro das súas provisións para responsabilidades.

Por outra banda, segue a apreciarse a inacción administrativa da entidade para executar os créditos para investimentos do capítulo 6º e para proceder á regularización contractual, pois non se realizou contratación ningunha polo procedemento aberto (o importe que figura na Nota 22 da Memoria corresponde a unha subministración obtida despois de adherirse a un acordo marco aprobado pola Deputación), realizándose toda a xestión contractual mediante contratos menores.

## VI. OUTRAS CUESTIÓNS<sup>5</sup>.

Con data de 13 de setembro de 2021, esta Intervención emitiu un informe de auditoría sobre as contas anuais do exercicio 2021 (expediente 2021000029440), no que se expresou unha **opinión modificada desfavorábel**.

Logo dese informe, na sesión plenaria que tivo lugar o día 21 de outubro de 2021, á proposta do titular da Presidencia, aprobouse un Plan de acción para corrixir as eivas advertidas. A tal fin, con posterioridade, procedeuse a aprobar o inventario que xa estaba elaborado, contabilizando o valor dos activos segundo figura en dito inventario e procedendo a dotar o gasto por

---

<sup>5</sup> Aplicamos a NIA-ES-SP- 1706 R e seguimos as indicacións e redacción proposta do apartado G) da Nota Técnica ONA 1/2020.





## INTERVENCIÓN XERAL E XESTIÓN ECONÓMICO-FINANXEIRA

amortizacións correspondente. Tamén se procedeu a regularizar os saldos de maior importancia nos conceptos non orzamentarios.

### VII. OUTRA INFORMACIÓN.<sup>6</sup>

Este apartado do informe está referido á Memoria de custos e rendemento de servizos e á Memoria demostrativa do grao no que se cumpriron os obxectivos programados, documentos que se achegan como anexos á Conta xeral que se está a auditar, dándolle así cumprimento ás esixencias establecidas na lexisación de facendas locais.

Cómpre advertir que a nosa opinión de auditoría sobre as contas anuais non cubre a información extracontable. A nosa responsabilidade sobre dita información que deriva da contabilidade, de conformidade co esixido pola normativa reguladora da actividade de auditoría de contas, consiste en avaliar e informar sobre a súa concordancia coas contas anuais, partindo do coñecemento da entidade que obtivemos na realización da auditoría e sen incluír información distinta da obtida como evidencia durante a mesma.

Asemade, a nosa responsabilidade con respecto aos indicadores extracontábeis do Consorcio, como consecuencia do seu carácter de ente público adscrito á Deputación da Coruña, consiste en avaliar e informar respecto de seu contido é conforme coa normativa que resulta de aplicación. No caso de que, con fundamento no traballo realizado, concluímos que existen incorreccións, temos a obriga de poñelas de manifesto.

Sobre a base do traballo realizado, esta outra información extracontable vese afectada en canto a súa concordancia e contido polas cuestións que se sinalan no apartado de fundamento de opinión con deficiencias, ao non reflectir as

---

<sup>6</sup> Aplicamos neste apartado o disposto na NIA-ES-SP-1720 R, responsabilidades do auditor con respecto a outra información.



## INTERVENCIÓN XERAL E XESTIÓN ECONÓMICO-FINANCEIRA

contas o importe dos dereitos recoñecidos netos no tocante á taxa pola prestación de servizos do Consorcio.

Por outra banda, aínda coñecendo o esforzo realizado para a mellora na xestión liquidatoria da taxa, da información dos documentos que se están a comentar neste apartado resulta que se teñen realizado 2.637 intervencións por parte dos efectivos dos 10 parques de bombeiros, non constando nesta documentación o custo unitario medio de cada intervención e en cada un dos parques, dato relevante de cara a futuras modificacións das tarifas aplicábeis.

Polo demais, reitérase neste apartado que na Memoria demostrativa do grao en que se teñen cumprido os obxectivos programados e o seu custe, debería engadirse unha comparación cuantitativa entre os dous modelos de xestión aos que se fai referencia.

## VIII. RESPONSABILIDADE DO CONTADANTE (TITULAR DA PRESIDENCIA) EN RELACIÓN ÁS CONTAS ANUAIS.

De conformidade co disposto no artigo 14<sup>o</sup>.19 dos Estatutos da entidade, a Presidencia é responsable de formular as contas anuais que se achegan, de forma que expresen a imaxe fiel do patrimonio, da situación financeira e dos resultados da entidade, de conformidade co marco normativo de información financeira aplicable a un consorcio adscrito a unha entidade local en España<sup>7</sup>, e de control interno establecidas<sup>8</sup> para permitir a preparación das contas anuais libres de incorrección material, debida a fraude ou a erro.

Na preparación das contas anuais, o órgano de xestión é responsable da valoración da capacidade da entidade para continuar como empresa en

---

<sup>7</sup> Capítulo VI do Título II da Lei 40/2015, do Réxime xurídico do Sector público e Texto refundido da Lei reguladora das Facendas locais aprobado por Real decreto legislativo 2/2004, de 5 de marzo, e Orde HAP/1781/2013, de 20 de setembro, pola que se aproba a Instrución do Modelo normal de Contabilidade local.



## INTERVENCIÓN XERAL E XESTIÓN ECONÓMICO-FINANCEIRA

funcionamento, revelando, segundo proceda, as cuestións relacionadas coa empresa en funcionamento e utilizando o principio contable de empresa en funcionamento, agás no caso de que o órgano de xestión tivese intención ou obriga legal de liquidar a entidade ou de cesar nas súas operacións, ou ben non exista outra alternativa realista.

### IX. RESPONSABILIDADE DO FUNCIONARIO AUDITOR.

Os nosos obxectivos son obter unha seguridade razoable de que as contas anuais no seu conxunto están libre de incorrección material, debida ao fraude ou ao erro, e emitir un informe de auditoría que contén a nosa opinión.

Seguriade razoable é un alto grao de seguridade, pero non garantiza que unha auditoría realizada de conformidade coa normativa reguladora da actividade de auditoría de contas vixente en España sempre detecte unha incorrección material cando existe. As incorreccións poden deberse a fraude ou erro e han de considerarse materiais se, individualmente ou de forma agregada, pode preverse razoablemente que inflúan nas decisións económicas que os usuarios toman basándose nas contas anuais.

Como parte dunha auditoría de conformidade coa normativa reguladora da actividade de auditoría de contas vixente para o Sector público en España, aplicamos o noso xuízo profesional e mantivemos unha actitude de escepticismo profesional durante toda auditoría.

Asemade:

- Identificamos e valoramos os riscos de incorrección material nas contas anuais, debida a fraude ou erro, diseñamos e aplicamos procedementos de auditoría<sup>8</sup> para facer fronte a ditos riscos e obtivemos evidencia de

---

<sup>8</sup> Utilizamos fundamentalmente procedementos analíticos da información que nos foi posta a nosa disposición, conforme ao previsto na NIA-ES-SP- 1520.



## INTERVENCIÓN XERAL E XESTIÓN ECONÓMICO-FINANCEIRA

auditoría suficiente para proporcionar un fundamento da nosa opinión. O risco de non detectar unha incorrección material debida ao fraude é mais elevado que no caso dunha incorrección material debida a erro, pois o fraude pode levar parello a colusión, falsificación, omisións deliberadas, manifestacións intencionadamente erradas ou a elusión do control interno.

- Obtivemos coñecemento do control interno<sup>9</sup> relevante para a auditoría co fin de diseñar procedementos de auditoría que sexan axeitados en función das circunstancias, e non coa finalidade de expresar unha opinión sobre a eficacia co control interno da entidade.
- Avaliamos se as políticas contábeis aplicadas son axeitadas e a razoabilidade das estimacións contábeis e a correspondente información revelada polo órgano de xestión.
- Concluimos sobre se é axeitada a utilización, polo órgano de xestión, do principio contábel de empresa en funcionamento e, baseándonos na evidencia de auditoría obtida, concluimos sobre se existe ou non unha incerteza material relacionada con feitos ou con condicións que poideran xerar dúbidas significativas sobre a capacidade da entidade para continuar como empresa en funcionamento. As nosas conclusións baséanse na evidencia de auditoría obtida ata a data do noso informe de auditoría; con todo, feitos ou condicións futuros poderán ser a causa de que a entidade deixe de ser unha empresa en funcionamento.
- Avaliamos a presentación global, a estrutura e o contido das contas anuais, incluída na información revelada, e se as contas anuais representan as transaccións e feitos subxacentes dun xeito que consiguen expresar a imaxe fiel.

---

<sup>9</sup> O sistema de control interno foi evaluado no documento de planificación da auditoría, tendo en conta o coñecemento da entidade e a experiencia acadada na auditoría realizada sobre as contas anuais de 2019.



## INTERVENCIÓN XERAL E XESTIÓN ECONÓMICO-FINANCEIRA

- Comunicámonos coa Presidencia da entidade en relación co alcance e o momento de realizar a auditoría planificada e os elementos relevantes da auditoría, así coma sobre calquera deficiencia significativa de control interno, que temos identificado no transcurso da auditoría<sup>10</sup>.
- Entre as cuestións que foron obxecto de comunicación ao órgano de goberno da entidade, determinamos as que teñen maior importancia na auditoría do período actual e, en consecuencia, as cuestións clave de auditoría.
- A nosa opinión de auditoría sobre as contas anuais non cubre outra información extracontable.

## X. INFORME SOBRE OUTROS REQUERIMENTOS LEGAIS E REGULAMENTARIOS.

Co alcance previsto na nosa auditoría de contas, temos revisado o cumprimento da legalidade con respecto á xestión económico-financeira da entidade durante o exercicio 2021. De dita revisión, temos observado os seguintes incumprimentos legais e regulamentarios:

- Tense aprobado o pagamento de remuneracións por asistencias ás persoas que forman parte dos órganos colexiados da entidade, agás ao persoal que forma parte da propia entidade, por un importe de 3.904,50 euros, aplicados sobre a aplicación orzamentaria 912.230.00, consumindo crédito a nivel de vinculación xurídica, pois a partida só dispoñía dun crédito inicial de 500 euros. Sobre a procedencia destes pagamentos, non consta que dende o inicio do actual mandato 2019-

<sup>10</sup> Con tal finalidade, foi notificada o documento TDA, termos de inicio de auditoría, no momento de inicio dos traballos. Asemade, na execución dos traballos, foron comunicados mediante dilixencia estendida para o efecto, que foi cursada a través do SIR, aqueles datos ou circunstancias significativas que ían a afectar a opinión modificada contida neste informe. En síntese, procurouse cumprir co disposto na NIA-ES-SP-1260-R.



## INTERVENCIÓN XERAL E XESTIÓN ECONÓMICO-FINANCEIRA

2023 se teña adoptado o acordo que esixe o artigo 75.3 da Lei 7/85, de Bases de réxime local, nin polo Pleno da Deputación (que debe pronunciarse sobre a compatibilidade destas percepcións co réxime de dedicación exclusiva das persoas afectadas que ostentan o cargo de deputadas no Pleno provincial), nin por parte do pleno da propia entidade auditada.

- Na xestión dos mantementos e servizos estase a utilizar o procedemento do contrato menor para a contratación da meirande parte das prestacións, incumpríndose o disposto no artigo 118.2 da Lei 9/2017, de contratos do sector público. Urxe, xa que logo, a tramitación de expedientes de contratación polo procedemento ordinario (artigo 131.2 da dedandita Lei), de xeito que se cumpla cos principios de publicidade, concorrencia e liberdade de acceso ás licitacións que esixe dita Lei en transposición das directivas comunitarias sobre contratación pública.

A Coruña, 05 de setembro de 2022,

Asdo. Electrónicamente por Juan Bautista Suárez Ramos.

Interventor adxunto.

Conforme,

O interventor xeral,

José Manuel Pardellas Rivera.



**INTERVENCIÓN XERAL E XESTIÓN ECONÓMICO-FINANCEIRA**

### **DILIXENCIA DE NOTIFICACIÓN:**

O presente informe emítese con carácter **DEFINITIVO e deberá notificarse á PRESIDENCIA DO CONSORCIO**, co fin de que se incorpore ao expediente de aprobación da Conta xeral do exercicio 2021 que se está a tramitar e, como anexo da mesma, se remita aos órganos de control externo, Consello de Contas de Galicia e Tribunal de Contas.

Asdo. Juan Bautista Suárez Ramos.

Interventor adxunto.